



PLANIRANE IZMJENE POPISA STANOVNIŠTVA U 2006. GODINI

Preko Popisa stanovništva i stanovanja (Census of Population and Housing) ABS (Australijski statistički biro) provodi svakih pet godina svoje najveće prikupljanje statističkih podataka. Cilj je ovog popisa da se odredi tačan broj osoba koje borave u Australiji na noć cenzusa, tj. na datum provođenja popisa, ključne pojedinosti o osobama i stambenim prilikama u kojima žive. Naredni popis u Australiji, petnaesti po redu, provest će se 8. avgusta 2006. godine.

Popisom stanovništva prikupe se različiti podaci od vitalne važnosti za djelotvorno planiranje budućnosti Australije od strane vlada, društvenih organizacija i privrede. Naročito je važan za osobe ne-engleskog jezičnog porijekla jer se prikupljeni podaci koriste za planiranje usluga kao što su na primjer finansiranje lokalnih društvenih centara, staračkih domova, škola i rasporeda emitiranja emisija na SBS-u.

Za Popis stanovništva u 2006. godini predviđene su razne promjene, uključujući:

- nekoliko novih pitanja koja odražavaju teme vezane uz sadašnji trend politike djelovanja, kao što su pitanje invaliditeta, dobrovoljni i neplaćeni rad; i
- ko bude htio moći će svoj formular za Popis u 2006. godini ispuniti i elektronskim putem preko Interneta.

ABS predlaže i nove inicijative kojima će se dodatno poboljšati vrijednost informacija prikupljenih Popisom u 2006. godini. Prijedlog za diskusiju ovih promjena može se naći na web stranici ABS-a na <www.abs.gov.au>.

Ključni dio ovog prijedloga je stvaranje "Statističke longitudinalne obrade podataka" (Statistical Longitudinal Census Dataset - SLCD) koja uključuje kombiniranje dobivenih informacija s Popisa stanovništva u 2006.godini i informacija iz ranijih popisa stanovništva. Pomoću SLCD-a proširit će se raznolikost podataka dostupnih za statističke potrebe i omogućiti identifikacija šablona za promjene u društvenim i ekonomskim okolnostima, za pojedince i kućanstva, do kojih dolazi tokom vremena.

Prijedlog ne uključuje pitanje čuvanja informacija o imenu i adresi osoba obuhvaćenih popisom stanovništva od strane ABS-a. Kao i kod prethodnih popisa, ABS će uništiti sve tragove nečijeg imena i adrese, nakon zavšetka obrade podataka iz popisa.

Voditelj programa popisa stanovništva, Paul Williams, izjavio je: "ABS vidi ovo kao jedan važan dio investiranja u našu budućnost. Potencijalno, nova obrada podataka može prikupiti mnogo važnih informacija o australijskom društvu i poboljšati razvoj politike djelovanja i odlučivanja u društvenoj zajednici."

“Ona omogućava potpunije korištenje prilično bogatog izvora informacija koje prikupljamo svakih pet godina tokom popisa, a na dobrobit Australijanaca”, izjavio je.

“Nisu donijete nikakve odluke o ovom prijedlogu”, kazao je. “ABS će nastaviti s ovim prijedlogom jedino ako je on prihvatljiv australijskoj zajednici.”

ABS poziva javnost i ostale zainteresovane strane da podnesu svoje mišljenje o ovom prijedlogu. Podnošenje vlastitog mišljenja može se obaviti putem web stranice ABS-a, ili na formularu kojeg se može dobiti od ABS-a pozivom na 1300 135 070. Krajnji rok za podnošenje na uvid vlastitog mišljenja je 10. juni 2005. godine.